

ALFREDO SUÁREZ CANAL
conselleiro de medio rural

"Non descartamos producir cereal para biodiésel pero en Galicia será difícil que sexa rendible"

■ Articular as infraestruturas básicas para o desenvolvemento do rural e as condicións que faciliten novos proxectos son os obxectivos dos investimentos que prevé a Consellería do Medio Rural, segundo o seu titular, Alfredo Suárez Canal. Entre

os moitos temas que aborda nesta entrevista, o do biodiésel é dos máis importantes, e a súa produción en Galicia non debe descartarse, aínda que en Galicia será difícil que sexa rendible.

santiago

MARÍA JOSÉ MIRAGAYA

—¿Que balance fai da xestión nos dous anos que leva ao fronte da Consellería?

—O balance é razoablemente satisfactorio. Os cambios que hai que facer teñen moito que ver con estrutura produtiva, normativas, ordenación en xeral do medio rural, da superficie e do monte. Eso require o seu tempo. A todos nos gustaría que fose máis rápido. Pero creo que se están sentando as bases de cambios estruturais importantes.

—Unha das principais medidas para a modernización é o Banco de Terras. ¿Cando se porá en marcha?

—Esta mesma semana aprobamos os cambios normativos que faltaban para que empece a funcionar en novembro: articular a política de prezos orientativos para as transaccións e fixar as cinco primeiras zonas xa decretadas como de especial interese agrario, entre elas A Limia. En novembro, calquera propietario vai poder incluír a finca no banco de terras.


—¿Conseguirá superar as reticencias dos propietarios?

—Nós estamos sorprendidos, porque nas charlas que estamos facendo para difundilo, veñen moitos a dicir "esto é o que necesitamos". Porque garante que van percibir unha renda, que a terra vai estar cuidada e que non van ter problemas para recuperar a finca. Lonxe de provocar recelos, a xente pode incluír nun banco que lle vai dar tódalas garantías.

—¿Hai medidas suficientes para evitar unha nova vaga como a do ano pasado?

—As bases están sentadas porque actuamos no terreo da prevención, da mellora do dispositivo, na persecución dos delinquentes ou negligentes, e ademais fíxose unha labor de vixilancia moi importante. Tamén para ir substituíndo o abandono do monte por unha valorización do mesmo. Pero o que vemos este ano noutras zonas do planeta pon de manifesto que o problema é moi importante. Require un esforzo continuado no tempo para que nun período de dez ou de doce anos os incendios intencionados sexan practicamente anecdóticos.

—Na eido xudicial, ¿castigábase suficientemente os que provocan



O conselleiro de Medio Rural, Alfredo Suárez Canal.

os incendios?

—O problema non está tanto nas penas, que poden ser moi importantes dependendo dos danos producidos polos lumes, senón en que sexamos capaces de articular ben as probas para que os delinquentes non poidan escapar. Neso se están dando grandes pasos, con máis medios técnicos para os corpos de seguridade. Tamén maior colaboración cidadá, que resulta fundamental para determinar a implicación dun delincente.

—¿Que resultado están dando os contratos homologados no sector vitícola?

Cando chegamos á Consellería, unha das nosas preocupacións foi dar un certo marco de estabilidade ás relacións entre os produtores e os transformadores. É unha necesidade, porque así podemos adicar ó realmente importante, que é a promoción e a comercialización. Eso se está conseguindo, pero sempre cunha perspectiva clara: que o futuro do viñado ten que orientarse á calidade. As catro denominacións de Ourense teñen especificidades diferentes. En Monterrei, estamos traballando para que haxa

unha maior capacidade de transformación. No Ribeiro queremos impulsar un plan de reestruturación, igual que en Valdeorras, que dea un impulso moi notable á calidade, para que unha parte moi importante da produción sexa de castes autóctonas. Sería facerlle un flaco favor ós produtores se non imos nesa liña, polo que poñeremos en marcha un potente plan de actuación. Na Ribeira Sacra estamos traballando para modernizar as infraestruturas e facilitar máis o traballo nesas fincas.

—O sector forestal, non aproveita todo o seu potencial. ¿Como se pode mellorar?

—Neste eido, os resultados non se ven da noite para a mañá. É importante que o sector teña ins-

"En incendios, as bases están sentadas porque actuamos no terreo da prevención"

trumentos normativos para facer xestións económicas e ambientalmente sustentables, en superficies grandes. Por iso xa creamos as "unidades de xestión forestal", que van permitir proxectos de xestión forestal con perspectiva de medio e longo prazo, sin que algún absentista poida inviabilizalo. Xa impulsamos na provincia diversos proxectos que compaxinan aproveitamento gandeiro e

forestal, onde antes existían terras abandonadas. Ademais, unha serie de ordes promoverán que naxa madeira de máis especies nos montes do país. E o vindeiro ano haberá unha Lei de Montes que designará a política forestal de Galicia nos próximos 40 ou 50 anos.

—Os produtores están preocupados polo prezo dos cereais. ¿Pecharán explotacións?

A nosa perspectiva é traballar para que cada vez menos as explotacións dependan de materias primas externas e que poidan abastecerse dunha parte importante de alimentos para o seu gando. Os sectores máis preocupantes son os de porcino e o cunícola. Estamos dispostos a contemplar medidas de actuación que mitiguen o impacto,

pero depende de mecanismos que nos permitan actuar.

—¿Vaise producir cereal en Galicia para biocombustible?

A nosa vocación é aproveitar a superficie agraria para producir alimento para o gando. Non descartamos algunha explotación destas características, pero a cantidade de hectáreas precisas para que sexa rendible dificulta que en Galicia se poidan ter estas explotacións.

A relación cos socialistas, "razoablemente satisfactoria"

—¿Como é a relación cos seus socios de Goberno na Xunta?

—Creo que razoablemente satisfactoria. É un Goberno de coalición despois de 16 anos de maioría absoluta, con dúas forzas políticas que teñen programas e perspectivas ideolóxicas diferentes, que foron capaces de por os intereses dos cidadáns por diante e acordar un programa de Goberno. Moitas das cousas que están neste programa se están facendo ou se están sentando as bases para que a final da lexislatura estean razoablemente desenvolvidas. Como calquera pode entender, nun Goberno de coalición sempre pode haber distintas perspectivas para enfocar algúns temas, pero eso non entorpece nada se se preserva que na actuación cara ós cidadáns prima o interese común. Os que creían que era difícil, estariánlles mostrando que somos capaces de responder ó programa pactado.

—O momento máis complicado para vostede no Goberno foi durante os incendios do ano pasado, cando incluso se falara de que podería deixar o posto.

—Todos os que estamos nun cargo público debemos ter claro que estamos interinamente. Xa dixen entón que analizaba o que acontecía e que era normal que se contemplaran tódalas hipóteses, pero que chegara a conclusión de que non tomamos ningunha decisión que significara un agravamento das consecuencias daquela vaga de lumes. Co paso do tempo, e co que está ocorrendo no resto do planeta, vese mellor o que aconteceu. Entón dixen que a maior contribución era aproveitar esa experiencia para tentar sentar as bases de cara a facer os deberes a medio prazo en materia de incendios. Creo que foi unha decisión acertada, porque aprendimos, e hoxe hai unha serie de iniciativas postas en marcha que terán que desenvolverse no futuro.

—¿Está o BNG aproveitando este cambio?

—O que si podemos dicir é que está sendo o PP. Nestas eleccións, aínda que sempre hai a tendencia a dicir que nos foi ben, aumentamos o número de alcaldías, gobernamos en moitos máis concellos e o mesmo lle pasa o PSOE. Quen perdeu cota foi o PP.